



## **Novitads dalla suprastanza communal**

### **Vendita parcella d'uaul alla vischnaunca Sursaissa Mundaun**

L'anteriura vischnaunca da Morissen era proprietaria dalla parcella d'uaul nr. 5198 a Casastat, Surcuolm. Suenter las fusiuns sesanfla la parcella ussa sin territori dalla vischnaunca Sursaissa Mundaun ed ei en proprietad dalla vischnaunca Lumnezia. Las duas vischnauncas ein secunvegnidas da far ina midada da proprietad che corrispunda al territori communal. Quei munta che la vischnaunca Lumnezia venda la parcella nr. 5198 alla vischnaunca Sursaissa Mundaun.

### **Brat da dretgs d'uaul Cavel a Lumbrein cun Surplatta a Duvin**

La vischnaunca Lumnezia posseda dretgs d'utilisaziun sigl uaul Surplatta Duvin. Da l'autra vart ei la vischnaunca Ilanz/Glion en possess digl uaul Cavel a Lumbrein. Omisdus uauls sesanflan ordeifer il territori communal cumpigliau e caschunan aschia dapli cuosts d'utilisaziun e manteniment. Perquei ein las duas vischnauncas secunvegnidas da brattar il diever e manteniment digl uaul Surplatta a Duvin encunter quel digl uaul Cavel a Lumbrein.

### **Dretg da retrer aua a Vignogn**

La suprastanza communal ha decidiu da conceder ad Arnold Cadalbert, Cuera, il dretg da retrer aua dalla parcella nr. 7073 dalla vischnaunca Lumnezia en favur dalla parcella nr. 7066 Runchiola a Vignogn.

### **Alzament tonnascha Rampa - Vrin**

Sin intervenziun dalla vischnaunca Lumnezia ha igl Uffeci da construcziun bassa dil cantun Grischun communicau ch'ei seigi pusseivel d'augmentar la limitaziun generala da peisa da 18 t sin 32 t sin la via cantunala Lumnezia da Degen – Vrin. En quei connex preveda igl UCB d'alzar la limitaziun da peisa da 18 t sin 32 t era per la secziun dalla via da Vrin – Sogn Giusep e Vrin – Vrin Dado. La procedura ei instradada e succeda enteifer publicaziuns officialas corrispudentas.

### **Staziuns per cargar e-bikes**

Sin territori dalla vischnaunca Lumnezia vegnan treis staziuns per cargar battarias dad e-bikes installadas. Las staziuns vegnan postadas a Vrin ed a Lumbrein sils plazs scola ed a Davos Munts ella vischinonza dall'ustria.

### **Cumpra parcella da baghegiar a Lumbrein**

La suprastanza communal ha decidiu da cumprar da Rest Leonard Capaul la parcella da baghegiar nr. 6241 a Lumbrein che mesira 612 m<sup>2</sup>. La parcella stat ussa a disposiziun a domiciliai ella vischnaunca Lumnezia che han interess da cumprar terren da baghegiar a Lumbrein.

### **Elecziun da persunal**

La suprastanza communal ha elegiu Daniel Wolf, Vella, sco collaboratur per la partiziun finanzas/persunal dall'administraziun communal Lumnezia. El remplazza Martin Derungs che terminescha sia lavur cun miez fenadur.

### **Controllas da baghegiar**

Las lavurs da controlla dilg uffeci da baghegiar vegnan exequidas egl avegnir entras il menaschi tecnic. Perencunter vegnan singulas lavurs secundaras dil menaschi tecnic, sco p.ex. manteniment da santeris ni tgira dil contuorn da stabiliments publics, exequidas sut lavur cumina.

### **Nominaziun da survigiladers per la controlla da cavacristallas**

Tenor art. 21 dalla lescha davart igl encurir e cavar cristallas e mineralias vegn la controlla dils cavacristallas reglada suandontamein:

*La legitimaziun ed obligaziun d'exequir la controlla dils cavacristallas han*

- a) ils survigiladers numnai dalla suprastonza communal*
- b) ils officials dalla vischnaunca Lumnezia*
- c) ils selviculturs dil revier forestal dalla vischnaunca Lumnezia*
- d) ils organs da polizia*

La suprastonza communal ha numnau tenor alinea a) il menaschi tecnic sco post per exequir la survigilonza dils cavacristallas.

### **Proximas radunonzas communalas**

Las proximas radunonzas communalas han liug ils 25 d'uost ed ils 15 da settember 2017.

### **Emissiun da televisiun**

Duront las empremas jamnas da fenadur realisescha la redacziun da televisiun SAT.1 in'emissiu da «landuf landab» en Surselva ed oravontut en Lumnezia.

### **Uffeci da posta Vella**

La Posta ha communicau ch'ella garanteschi da mantener igl uffeci da posta Vella silmeins entochen igl onn 2020.